

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het – die Torah van Melgisédek. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die Torah van YHVH net die dooie letter van die wet wees!!
Yeshua is die hart van die Vader!

Parashah 8: *Vayish'lach* (הלשי"ר) – En Hy Het Gestuur

Ya'akov het boodskappers voor hom uitgestuur na sy broer `Esav in die land van Se'ir, die land Edom,... Gen. 32:3 – PWL¹

Torah: Gen. 32:3 tot 36:43

Haftorah: Hosea 11:7 tot 12:12

Nuwe Verbond: Matt. 26:36 tot 46; Rom. 12:19; Fil. 3:5; Heb. 8:8; Jak. 7:4 tot 10.

Hierdie notas is aanvullend tot die vorige notas vir Parashah 8 wat afgelaai kan word by: [Parashah8Notas14](#), [Parashah8Notas15](#) en by [Parashah8Notas.16](#).

Wisdom is an approach to life, not a comparative contest. The wise man is the individual who does not compare his wisdom to that of others, but because of his love for wisdom he chooses to learn from everyone, for each person has wisdom to share – Anonymous.

We are most blinded not by things we don't know, but by things we think we know – Anonymous.

Vertroue is aktiewe geloof in aksie. Totdat ons nie doen nie, is ons geloof onvolledig en word dit nooit 'vertroue' nie. Geloof is vertroue plus gehoorsaamheid – dit is om die stem van YHVH te hoor en om te gaan doen wat jy gehoor het!

God gives His Own Self totally to us that we may offer ourselves completely to Him – Watchman Nee.

¹ Alle teksverwysings is geneem uit PWL (Pad van Waarheid tot die Lewe) Vertaling (www.padwlewe.ch), behalwe waar anders vermeld. Om 'n kopie van die Bybel te bekom kan Gerrie Coetzee per e-pos by padwlewe@yahoo.com of telefonies by 074 361 2134 gekontak word.

Gedeeltelike gehoorsaamheid aan YHVH is volledige ongehoorsaamheid!!

Torah Bespreking

Hersiening

In verlede week se Torahskriflesing het ons gesien hoe Jakob in 'n situasie beland het wat deur YHVH self beplan was. Jakob het nie net vir sy lewe gevrees toe hy vir Esau gevlug het nie, maar was sekerlik ook verward en onseker, want aan hom was die belofte van YHVH aan Abraham van die Messias en van die Beloofde Land, asook die nageslag wat dit sal beërwe, via Isak oorgedra. En tog, hy is die een wat uit Kanaän, die Beloofde Land, moet vlug terwyl sy broer Esau agterbly! Jakob moes eers in konfrontasie met homself kom alvorens hy 'n geskikte werktuig in YHVH se hande kon wees. Hy moes homself eers voor YHVH verneder, sodat YHVH hom kan verhoog (Jak. 4:6 tot 9).

Hierdie week het Jakob 'n naamsveranderende ontmoeting met YHVH – hy sal voortaan Yisra'el genoem word!

Jy Sal Yisra'el Genoem Word

Hy sê: “Jy sal nie meer Ya'akov genoem word nie, maar Yisra'el, want jy het krag soos 'n prins gehad teenoor God en die mense en het oorwin.” Gen. 32:28

God het vir hom gesê: “Jou naam is Ya'akov; jy sal verder nie Ya'akov genoem word nie, maar Yisra'el sal jou naam wees” en Hy het hom Yisra'el genoem. Gen. 35:10.

Yisra beteken *Hy sal regeer* en *El* beteken *Magtige God*. Yisra'el beteken dus om deur die Magtige God, YHVH (יהוה) regeer te word. Uit Jakob, wie se naam nou Yisra'el geword het, sal die nageslag kom oor wie YHVH-God sal heers! Daarom is Yisra'el se daaglikse belydenis:

Sh'ma Yisra'el, Yahuah Eloheinu, Yahuah egad.

Luister, oor wie Hy heers as Magtige God, Yahuah is ons God, Yahuah is Een.

Die volk Yisra'el sal dus ook ewiglik hulle wees waaroor YHVH heers – YHVH se verkose volk! En, baie belangrik, Yisra'el sal die volk wees deur wie die belofte wat YHVH aan Abraham gemaak het, vervul sou word, naamlik:

En Ek sal jou 'n groot nasie maak en jou seën en jou karakter en outoriteit (naam) groot maak en jy sal 'n seën wees en Ek sal diegene seën wat jou seën en hom vervloek wat jou vervloek en in jou sal al die families van die aarde geseën word. Gen. 12:2 en 3

Hierdie belofte aan Abraham, naamlik *in jou sal al die families van die aarde geseën word*, verwys terug na die sondeval en na die saad van die vrou wat die kop van die slang (Satan) sal vertrap:

14 *Toe sê יהוה-God aan die slang: “Omdat jy dit gedoen het, is jy meer as al die vee en al die diere van die veld vervloek. Jy moet op jou maag seil en jy moet stof eet al die dae van jou lewe. **15** Ek sal vyandskap stel tussen jou en die vrou en tussen jou saad en haar Saad. Hy sal jou kop vertrap en jy sal Sy hakskeen byt.” Gen. 3:14 en 15.*

Yisra'el is deel van YHVH se Raadsplan om alles deur Yeshua Die Gesalfde Een te herstel soos dit aan die begin voor die sondeval was. Deur Abraham, Isak en Jakob sou die belofte van die Messias vervul word.

Maar Yisra'el is nie net YHVH se volk nie, maar ook YHVH se Koninkryk hier op aarde. YHVH sal oor Yisra'el regeer tot Yeshua se wederkoms wanneer Hyself as ewige Koning en Hoofpriester oor YHVH se Koninkryk hier op aarde sal regeer.

Yisra'el is die naam (karakter en outoriteit) van YHVH se uitverkore volk en is die naam van YHVH se land, naamlik Sy Koninkryk. Daarom is dit uiters belangrik dat ons wat vertrou in Yeshua as die Messias moet weet wie is Yisra'el en waar is Yisra'el. Soos eindtydgebure toenemend rondom ons ontvou, is die antwoord op hierdie vrae van kardinale belang, want dit sal in die einde van dae jou en my redding bepaal, asook ons oorlewing!

Derdens, en ewe belangrik, moet ons sekerheid hê van watter Torah van YHVH om te volg en dat ons dit nougeset sal doen.

Wie Is Israel?

Abraham kan beskou word as die vader van Yisra'el en die Beloofde Land Kanaän, as die Koninkryk van YHVH. Aan Abraham het YHVH die belofte gegee en gesê: *Ek sal jou 'n groot nasie maak en jou seën..... en in jou sal al die families van die aarde geseën word.....en aan jou nageslag sal ek hierdie land gee* (Gen. 12:2, 3 en 12; Gen. 15:18 tot 21). Die belofte van die nageslag in wie al die families van die aarde geseën sou word het YHVH by wyse van 'n eedswering gemaak (Gen. 12:2 en 3; Heb. 6:13), terwyl die belofte van die grondgebied – die Koninkryk – het YHVH by wyse van 'n bloedverbond met Abraham bekragtig (Gen. 15:8 tot 21).

Beide hierdie beloftes aan Abraham is ook aan Isak en Jakob oorgedra. Al drie het dus vertrou gehad in die Messias wat volgens YHVH se belofte sou kom en vertrou gehad in die Beloofde Land waar YHVH se Koninkryk gevestig sou word.

In vertrou is hulle almal dood, sonder om die beloftes te ontvang, maar hulle het dit op 'n afstand gesien en hulleself daarin verheug en het erken dat hulle vreemdelinge en nomades op aarde is. Heb. 11:13.

Dit is daarom duidelik dat die volk Yisra'el was en is diegene wat vertrou het in Yeshua, Die Gesalfde Een!

Hierdie feit word deur die Skrifte van die nuwe verbond bevestig, naamlik dat almal wat in Yeshua as Die Gesalfde Seun van God glo, die ware Yisra'el is – die uitverkore volk van YHVH.

Paulus skryf in Gal. 3:7 en 29 die volgende:

7 Weet daarom dat dié wat uit die vertrou is, hulle is kinders van Avraham.

29As julle aan Die Gesalfde Een behoort, is julle die saad van Avraham en volgens die belofte, erfgename.

Op grond van ons vertrou in Yeshua Die Gesalfde Een is ons dus kinders van Abraham, naamlik sy nageslag en dus ook sy erfgenaam.

14 want as hulle erfgename is vanuit die geskrewe wet, dan het vertrouwe geen doel nie en is die belofte gekanselleer, **15** want die geskrewe wet bring straf, maar waar geen geskrewe wet is nie, is daar ook geen oortreding van die geskrewe wet nie. **16** As gevolg hiervan sal iemand deur vertrouwe, wat uit onverdiende guns is, onskuldig verklaar word en sal die belofte seker wees vir al sy saad; nie alleen vir dié wat uit die geskrewe wet is nie, maar ook vir dié wat uit die vertrouwe van Avraham is, die vader van ons almal. Rom.4:14 tot 16.

Abraham is ook die aardsvader van die onbesnedene (Rom. 4:11). Ons is die kinders van Abraham uitsluitlik op grond van die genade van YHVH deur vertrouwe in Yeshua. Hierdie belofte staan vas vir die hele nageslag, naamlik vir Jood en nie-Jood (Rom. 4:16). Elkeen wat uit die vertrouwe is, word saam met Abraham geseën (Gal. 3:9). Om die nageslag (kinders) van Abraham te wees is dus nie op grond van verdienste nie; ook nie deur die Torah van Moses te onderhou of op enige ander wyse nie. Dit is alleenlik deur vertrouwe!

Dit is vertrouwe dat YHVH die belofte *en in jou sal al die families van die aarde geseën word* vervul het wat ons die nageslag van Abraham maak. Abraham is deur vertrouwe geregverdig verklaar (Gen. 15:6; Rom. 4:9) en dit is alleenlik deur vertrouwe wat ons geregverdig verklaar word. Vertrouwe is dus die gemeenskaplike faktor van ons familie verbintenis met Abraham.

Opsommend: Elke gelowige in Yeshua word deel van YHVH se volk, naamlik Yisra'el, wat met Abraham as vader begin het. Daar is nie meer 'n onderskeid tussen Jood of Griek nie of tussen slaaf of vryman nie of tussen man en vrou nie, want ons is almal een in Yeshua Messias (Gal. 3:28). Ons is almal die kinders van Abraham wat deur vertrouwe in Yeshua Messias die kinders van YHVH, naamlik Sy volk Yisra'el geword het.

Yisra'el is **nie** net die fisiese nageslag van Abraham nie soos Paulus dit baie duidelik stel:

6 Dit is nie asof die boodskap van God gefaal het nie, want nie almal wat vanuit Yisra'el is, is Yisra'el nie. **7** Ook nie omdat hulle almal Avraham se nageslag is, is hulle kinders nie, want dit is gesê: “in Yitz'gak sal hulle jou nageslag genoem word.” **8** Dit is: nie dié wat kinders van die vlees is, is kinders van God nie, maar die kinders van die belofte word gereken as nageslag. Rom. 9:6 tot 8.

YHVH heers oor elkeen wat vertrouwe het in Yeshua as Die Gesalfde Een, want dit is wie Sy volk Yisra'el is!

Waar is Yisra'el?

Net voor Yeshua opgeneem is in die hemel wou Sy dissipels weet wanneer die herstel van die koninkryk van Yisra'el plaas gaan vind.

Toe hulle saam met Hom was, vra hulle vir Hom en sê: “Ons Meester, gaan U in hierdie tyd die koninkryk van Yisra'el herstel?” Hy antwoord hulle: “Dit is nie vir julle om die vasgestelde tye te ken wat die Vader deur Sy eie Outoriteit bepaal het nie, maar wanneer die Gees van Afsondering oor julle kom sal julle krag ontvang en julle sal My getuies wees in Yerushalayim en in die hele Y'hudah en ook in Shomron en tot by die grense van die aarde.”
Hand. 1:6 tot 8

Die dissipels het 'n verwagting gehad dat Yeshua volgens die profesie in Jes. 9:3 tot 7 die Koninkryk gaan herstel soos dit in die tyd van Dawid was.

***3**U het die nasie vermenigvuldig, hulle vreugde vermeerder; hulle was vrolik in U Teenwoordigheid, soos met die vrolikheid van oestyd, soos mense in die rondte swaai van*

vreugde as hulle die buit verdeel, ⁴want U het die juk van hulle las, die staf op hulle skouers, die lat van hulle onderdrukker, soos met die geveg van Midyan, verbreek, ⁵want elke stem wat gehoor word, bring verskrikking en klere wat in bloed gerol is, maar dit sal wees om te verbrand; brandstof vir die vuur, ⁶want 'n jong Seun is vir ons gebore, 'n Seun is vir ons gegee; die regering sal op Sy skouers rus; Sy Naam (Karakter en Outoriteit) word genoem: Wonderlike Raadgewer, Magtige God, Ewige Prins van Vrede. ⁷Daar sal geen einde wees aan die vermeerdering van Sy regering en van Sy vrede, op die troon van Dawid en oor sy koninkryk, nie; om dit te bevestig en dit in stand te hou met regverdigheid, onpartydige opregtheid, van toe af aan en vir ewig. Die ywer van יהוה-Tzva 'ot sal dit uitvoer.

Maar Yeshua het Sy dissipels geantwoord: *Dit is nie vir julle om die vasgestelde tye te ken wat die Vader deur Sy eie Outoriteit bepaal het nie.* Met hierdie antwoord het Yeshua bevestig dat dit die Vader is wat sal bepaal wanneer die fisiese Koninkryk van Yisra'el herstel sal word.

Tweedens het Yeshua vir hulle gesê dat wanneer die Gees van Afsondering oor hulle kom, sal hulle krag ontvang en hulle sal Sy getuies wees in Jerusalem en in die hele Judea en ook in Samaria en tot by die grense van die aarde. Die dissipels moet die getuies wees dat YHVH se Hemelse Koninkryk gekom het en dat hulle hierdie Koninkryk moet vestig deur hierdie goeie boodskap aan die ganse skepping te gaan verkondig en om dissipels te maak wat alles sal onderhou wat Yeshua hulle geleer het.

Met die folterdood en opstanding van Yeshua het die fisiese Koninkryk (Yisra'el) 'n geestelike Koninkryk geword. Dit sal so bly tot tyd en wyl YHVH-God self sal besluit wanneer die fisiese Koninkryk (land) van Yisra'el weer herstel sal word! Daar het 'n oorgang van die fisiese Koninkryk na die geestelike Koninkryk plaasgevind. Die volgende Skrifte is bevestiging hiervan:

²⁰Toe sommige Fariseërs hom vra wanneer die Koninkryk van God kom, het Hy hulle geantwoord en gesê: “Die Koninkryk van God kom nie sigbaar nie ²¹ en hulle sal ook nie sê: ‘Let op, dit is hier!’ of: ‘Let op, dit is daar!’ nie, want let op, die Koninkryk van God is in sommige van julle.” Luk. 17:20 en 21.

Let op Yeshua se woorde: *die Koninkryk van God is in sommige van julle!* Dit beteken dat YHVH se Koninkryk is net in diegene wat vertrou het dat Yeshua die Messias is!

Teenoor Pilatus het Yeshua ook bevestig dat Sy Koninkryk nie van hierdie wêreld is nie:

Yeshua antwoord: “My Koninkryk is nie van hierdie wêreld nie. As My Koninkryk van hierdie wêreld was, sou My dienaars geveg het sodat Ek nie aan die Jode oorgelewer word nie, maar My Koninkryk is nie nou van hier nie.” Joh. 18:36.

Let op Yeshua se woorde: *maar My Koninkryk is **nie nou van hier nie!*** Hiervolgens is dit glashelder duidelik dat YHVH se fisiese Koninkryk nie hier op aarde gevestig is nie – dit sal wel in die toekoms so wees, maar op 'n tyd wat YHVH sal bepaal!

Daarom moet ons as gelowiges in Yeshua as Die Gesalfde Een se oë gevestig wees op die hemelse Jerusalem.

¹² daarom het Yeshua ook, om die mense deur Sy eie bloed af te sonder, buitekant die stad gely; ¹³ daarom moet ons ook uitgaan na Hom toe, buitekant die kamp, terwyl ons Sy skande dra, ¹⁴ want ons het hier geen blywende stad nie, maar ons kyk uit vir die één wat kom. Heb. 13: 12 tot 14.

Elkeen wat deur vertroue in Yeshua as die Messias deur die Gees van God wedergebore is, het gekom by die berg Sion en die hemelse Jerusalem en is deel van die vergadering van tien duisende engele en die gemeente van eersgeborenes!

22 Julle het egter gekom by die berg Tziyon en die stad van die lewende God, die hemelse Yerushalayim en vergadering van tien duisende engele, 23 by die gemeente van eersgeborenes wat in die hemel opgeskrywe is en by God, die Regter van almal en by die geeste van die onskuldiges wat volmaak gemaak is 24 en by Yeshua, die Tussenganger van die nuwe verbond en die sprinkeling van bloed wat duideliker praat as dié van Hevel. Heb. 12:22 tot 24.

Sarah en Hagar is ook 'n sinnebeeld van hierdie geestelike waarheid soos wat Paulus dit in Gal. 4:22 tot 26 verduidelik!

22 Want daar is geskrywe: "Avraham het twee seuns gehad, een vanuit 'n slavin en een vanuit 'n vry vrou, 23 maar hy wat vanuit die slavin gebore is, is na die vlees gebore, maar die een vanuit die vry vrou deur die belofte. 24 Hierdie is 'n illustrasie van twee verbonde: een, wat kom van die berg Sinai, wat geboorte gee in slawerny: dit is Hagar, 25 want Hagar staan vir die berg Sinai wat in Arabië is en oorgee aan die Yerushalayim van nou, wat saam met haar kinders in slawerny is, 26 maar daardie Yerushalayim is die vry vrou: wat ons almal se moeder is.

Toe Paulus hierdie brief geskryf het, was die bestaande Jerusalem in 'geestelike slawerny' weens die Torah van Moses. Maar elkeen wat vertrou in Yeshua as die Messias is bevry van daardie slawejuk en deel van die hemelse Jerusalem!

Ons volg dus in die voetspore van ons voorvaders van Yisra'el wat ook verlang het na die hemelse Jerusalem:

13 In vertroue is hulle almal dood, sonder om die beloftes te ontvang, maar hulle het dit op 'n afstand gesien en hulleself daarin verheug en het erken dat hulle vreemdelinge en nomades op aarde is, 14 want die wat sulke dinge sê, wys dat hulle vir hulle 'n stad soek. 15 As hulle na dié stad waaruit hulle weggetrek het, gesoek het, was daar vir hulle tyd om weer daarheen terug te gaan, 16 maar nou is dit duidelik dat hulle na 'n beter een verlang; na dit wat in die hemel is; daarom skaam God Hom nie vir hulle om hulle God genoem te word nie, want Hy het vir hulle 'n stad voorberei. Heb. 11:13 tot 16.

Onder die nuwe verbond in Yeshua is die Koninkryk van Yisra'el nie 'n fisiese Koninkryk nie, maar wel 'n geestelike wat bestaan uit elkeen wat vertrou in YHVH se voorsiening in Yeshua, Die Gesalfde Een! As gelowiges bou ons aan YHVH se Hemelse Koninkryk tot Yeshua weer sal kom om dit wat geestelik is weer fisies te herstel.

In hierdie hemelse Koninkryk is ons as die ware Yisra'el, naamlik Jood en nie-Jood wat Yeshua as Messias bely en dus die geestelike afstammeling van Abraham is – die lewende tempel (1 Kor. 3:16 en 17, 2 Kor. 6:14 tot 18).

21 In Hom word die hele gebou aanmekaar gesit en dit groei tot 'n afgesonderde tempel in eenheid met יהוה 22 terwyl julle ook vir Hom gebou word tot 'n blyplek van God in die Gees. Efes. 2:21 en 22.

YHVH se Koninkryk, Yisra'el, is in ons en is nie beperk tot 'n bepaalde grondgebied nie. Daar waar ons onself bevind, daar is Yisra'el!!

Watter Torah?

Die ware Yisra'el van die nuwe verbond volg die Torah van Yeshua, naamlik die Melgisédek Torah, want die Torah van Moses was Yisra'el van ouds se tugmeester tot Yeshua sou kom (Gal. 3:24 en 25)! Paulus verduidelik dit soos volg:

1 Ek sê: solank as die erfgenaam 'n kind is, verskil hy nie van die slawe nie, alhoewel hy hulle almal se meester is, 2 maar hy staan onder voogde en toesighouers tot op die tyd, soos deur sy vader bepaal is. 3 So was ons ook, toe ons kinders was, in slawerny onder die beginsels van die wêreld, 4 maar toe die volheid van die tyd gekom het, het God Sy Seun gestuur. Hy is uit 'n vrou gebore en onderworpe aan die geskrewe wet, 5 om die wat onder die geskrewe wet was, los te koop sodat ons die aanvaarding as kinders kon ontvang, 6 maar omdat julle kinders is, het God die Gees van Sy Seun in julle verstand, wil en emosie gestuur, wat uitroep tot die Vader: "Ons Vader!" Gal. 4:1 tot 6.

Daar het dus 'n verandering in YHVH se Torah gekom (Heb. 7:11 tot 28) op grond van die folterdood en opstanding van Yeshua wat die skuldbrief van die Torah van Moses aan die kruis vasgeslaan het (Kol. 2:14). Daar is dus nie meer 'n fisiese tempel nie, en die Levitiese priesterorde is met die orde van Melgisédek vervang. Ons dien in 'n Hemelse Koninkryk as 'n koninklike priesterdom onder ons ewige Koning en Ewige Melgisédek Hoofpriester! Daarom is ons gehoorsaam aan die Torah van Yeshua soos YHVH dit aanvanklik beplan het met die bloedverbond by Sinai, naamlik die boek van die verbond (Ex. 19: tot 24:11) en soos dit vir ons openbaar gemaak word in die Skrifte van die nuwe verbond.

Vir 'n bondige verduideliking van die Torah van Yeshua kan jy die artikel "Melgisedekorde Saamgevat" lees wat afgelaai kan word by: [MelgisedekordeSaamgevat](#)

Jy sal Yisra'el genoem word indien jy bely dat Yeshua Die Gesalfde Een is en indien jy diens doen in die Hemelse Koninkryk as priester in die orde van Melgisédek en indien jy die Torah van Yeshua nougeset onderhou!

Bepeins of Bespreek

1. Soos bespreek was Yeshua se antwoord op die vraag wanneer Yeshua die Koninkryk van Yisrae'el sal herstel dat dit alleenlik die Vader is wat sal bepaal wanneer die fisiese Koninkryk van Yisra'el herstel sal word. In die lig hiervan, en alles wat in hierdie notas bespreek is, moet ons vra of dit wat sedert Mei 1948 in Yisra'el gebeur die werk van YHVH-God is en of dit die werk van mense is? Alvorens jy hierdie vraag beantwoord moet jy en ek ook beseftig dat daar 'n groep ortodokse Jode is ([True Torah Jews](#)) wat ook oortuig is dat die huidige Yisra'el nie die werk van YHVH is nie, maar wel die van mense. Hierdie Jode onder die vaandel van *Neturei Karta* is gekant teen die Sionistiese staat van Yisra'el (<http://www.nkusa.org/AboutUs/>). Meer inligting is ook verkrygbaar op die webskakel: [Jews United Against Zionism](#)
2. Is jou oë gevestig op die fisiese Yisra'el as die biologiese nageslag van Abraham en op die fisiese land Yisra'el? Indien wel, dan bestaan die moontlikheid dat jy in die einde van dae mislei gaan word, want die Antimessias sal kom na 'n koninkryk wat deur mense handeling tot stand gebring sal word. Onthou: Yeshua gaan kom om die Hemelse Koninkryk hier op aarde te kom vestig! Daarom bid ons daaglik: *Laat U Koninkryk kom, laat U wil gedoen word, op die aarde soos in die hemel* (Matt. 6:10). Is die huidige fisiese Yisra'el YHVH se Koninkryk?

3. Die hemelse Koninkryk van God moet eerstens in jou en my gevestig word (Matt. 6:33), alvorens jy en ek 'n bydrae kan maak om dit hier op aarde te vestig. Elke gelowige in Yeshua Messias moet 'n 'mobiele mikrokosmos' van YHVH se Koninkryk wees!

-O-O-O-O-O-O-O-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.

Johan.

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.